

# Jenis Laporan :-

- Sekolah anda telah mengadakan **Hari Kantin** pada minggu lepas. Sebagai **setiausaha Hari Kantin**, anda telah diminta untuk menulis **laporan** tentang program-program yang dijalankan pada hari tersebut. Tulis laporan itu selengkapnya

## Laporan Program Hari Kantin Sekolah Menengah Foon Yew

Sekolah Menengah Foon Yew telah mengadakan Hari Kantin pada **28 Julai 2022** di Dewan sekolah. Majlis Hari Kantin telah dirasmikan oleh **Pengerusi Persatuan Ibu Bapa dan Guru (PIBG) Sekolah Menengah Foon Yew**. Majlis Hari Kantin telah **dimulakan tepat pada pukul 8.00 pagi dan tamat pada pukul 2.00 petang**. Semua guru terlibat dalam aktiviti Hari Kantin dengan bantuan **para pelajar** yang dipilih oleh guru-guru berkenaan.

Antara **program** yang telah dijalankan semasa Hari Kantin ialah **pesta jualan makanan dan minuman serta pelbagai cenderamata**. **Makanan pelbagai kaum** disediakan oleh para guru dan pelajar seperti nasi lemak, laksa, capati, mihun, keropok, lekor dan kuih bulan. Ada juga gerai yang **menjual makanan tradisi** pelbagai kaum seperti lemang, wajik, penganan dan sebagainya. Para pengunjung **berpuas hati** dengan kepelbagaian makanan yang dijual semasa Hari Kantin.

Selain itu, pada tahun ini terdapat banyak **cenderamata dijual seperti** anak patung, rantai kunci, baju-T, alat tulis yang bercetak nama sekolah, kad dan pelekat bergambar. Dengan **harga yang berpatutan**, kedai-kedai cenderamata ini sentiasa **penuh dengan pelanggan terutama dalam kalangan pelajar sekolah dan kanak-kanak**. Walau bagaimanapun, sambutan paling hebat dilihat di gerai makanan dan minuman kerana **keghairahan pengunjung untuk merasai juadah yang dijual oleh warga sekolah**. Dalam hal ini, para pelajar dapat **mengenali makanan tradisi kaum lain di negara ini**.

Program lain yang diadakan sempena Hari Kantin ialah **aktiviti permainan**. Sebagai contohnya **rumah hantu** yang **dijalankan oleh Persatuan Sejarah dan Geografi**. Bayaran yang dikenakan untuk masuk ke rumah hantu adalah sebanyak RM2. **Banyak pengunjung beratur** di luar kelas untuk **merasai pengalaman seram** apabila berada di dalam rumah hantu. Rata-rata **pengunjung menyatakan bahawa** mereka berasa seolah-olah berada di dalam sebuah rumah lama yang penuh dengan hantu-hantu yang menyeramkan.

Sebagai acara selingan pada hari tersebut, **Kelab Muzik sekolah** telah **memainkan lagu-lagu mengikut permintaan para pelajar dan pengunjung**. Bayaran yang dikenakan adalah sebanyak 50 sen untuk sebuah lagu. Para pelajar paling menyukai aktiviti ini kerana **nama pembeli dan penerima lagu disebut oleh juruhebah** yang bertugas. Dalam segmen ini, banyak **guru menerima lagu daripada para pelajar** dengan **ucapan terima kasih** kerana telah membimbing mereka dalam bidang pelajaran.

Akhir kata, Hari Kantin yang dijalankan **berjaya mengutip hasil** yang **melebihi sasaran yang ditetapkan oleh pihak sekolah**. Keseluruhan kutipan untuk Hari Kantin adalah **sebanyak RM30,000**. Pihak sekolah telah **menyasarkan kutipan sebanyak RM15,000**. Pencapaian ini **membanggakan pihak sekolah** yang diibaratkan **seperti kecil tapak tangan, nyiru ditadahkan**.

Dilaporkan oleh,

20 SEPTEMBER 2016

malaysiarangai 2

(SITI PETIMAH BINTI IBRAHIM)

Setiausaha Hari Kantin,

Sekolah Menengah Foon Yew.